

Corporaziun Evangelica Zernez

Radunanza generala da marcurdi, ils 19 dad avrigl 2023, a las 20:00h illa aula da la chasa da scoula a Zernez

Preschaints: 28 persunas cun dret da vuschar

S-chüsats: Natalia Roner Florin, Esther Christoffel, Letizia Brot

Tractandas

1. Tscherna dals scrutinadurs
2. Protocol da la radunanza generala a Zernez dals 27 avrigl 2022
3. Rapport annual dal president 2022
4. Rendaquint 2022 e rapport dals revisurs da quint
5. Orientaziun trattativas/ barat chasa Pravenda Zernez abitaziun Lavin
6. Preventiv 2024
7. Fixar il pè d'impostas da la baselgia per l'on 2024
8. Orientaziun / Varia

Davo la radunanza giordaina amo ün aperitiv da cumpagnia.

Bivgnaint dal president Hermann Thom a las votantas ed ils votants. Davo il bivgnaint ha el fat ün cuort pled sün via sur dals impissamaints e las tensiuns electricas cha quels chaschunan ant il tscharvè uman cun finir quel cul giavüschi per la radunanza chi detta buns impissamaints e bunas decisiuns.

Davo ha Steivan Gaudenz dat aint il tun e tuot ils preschaints han chantà insembel il coral numer 12.

1. Tscherna dals scrutinadurs

Il president propuona da tour sco scrutinadurs a Reto Lehner ed a Anna Kirchen els han tuots duos üna piazza cun buna survista sur da tuot ils votants.

2. Protocol da la radunanza generala a Zernez dals 27 avrigl 2022

Il protocol nu vain prelet, cun quai ch'el es stat exposat in differents lös ed as rechatta eir sül la pagina dad internet da la corporaziun evangelica. Il protocol vain fat bun sco exposat sainza cuntravusch.

3. Rapport annual dal president 2022

La radunanza piglia cogniziun dal rapport dal president. Il president Hermann Thom prelegia seis rapport annual.

Rapport dal president da la raspada da Zernez pel 2022

Charas preschaintas, chars preschaints

Il protocol da la radunanza generala da l'on passà, cha no vain gùsta fat bun, tratta quella radunanza, illa quala no vain rumaglià e serrà giò nossa collavuraziun cul ultim ravarenda e la desditta cha no vain stuvü dar ad el. Eir schi ha dat eir d'ürant l'on scuors amo ün o l'oter disgust, nu giaina hoz plü aint sün quel tema e laschain il passà esser passà. Oramai cha müdà nu po' quel inamöd bricha gnir plü, laschaina que uossa propa esser per bun.

L'on scuors es per mai sco president nempe stat ün on da blera lavur, ma tuot in tuot eir ün on agreabel ed allegraivel. Allegraivel esa stat il fat cha adonta cha'l post dal ravarenda es stat vacant, nu vaina brichafat gnü da scurnir la sporta da nossa raspada. Ils cults divins sun gnüts fats da substitutas e substituts. Pustüt grazcha a Magnus Schleich ed Annette Jungen chi han portà pro fich bier a quel fat, ma eir grazcha a Fadri Häfner e tuot tschels e tschellas ravarendas e predichants laics. L'instrucziun in scoula pro'l s-chalin ot ha surtut Anna Kirchen e l'instrucziun da confirmands e preparands ha fat Silvia Schlegel chi ha eir in collavuraziun cun Annette Jungen preparà la confirmaziun da nossas 4 confirmandas e nos 7 confirmands in dumengia da las palmas, als 2 avrigl. No vain adüna chattà soluziuns per mincha battaisem e per mincha funaral, no vain als 23 avuost da l'on passà gnü il viadi pels seniors, no vain als 5 settember organisà ün cult divin special per commemorar ils 150 ons daspö il fö da Zernez, no vain pudü festagiar la festa federala cul cult divin ecumenic accumpagnà da la musica dals corns da chatscha, no vain la seguonda eivna da las vacanzas d'utuon fat il viadi da confirmands, no vain festagià als 30 october ils cults divins da la festa da la raccolta a Brail ed a Susch cun partecipaziun da confirmandas e confirmands. Als 27 november vain gnü il cult divin da la prüma dumengia d'Advent cun partecipaziun da las preparandas ed ils preparands. No vain per la prüma jada organisà ün davomezdi d'Advent culs seniors illa gruppa da chüra in Röven 8 e sün giavüsch manà a seniors dal Röven 8 sün baselgia per visitar las predgias. No vain sco minch'on organisà ün chant avert d'Advent e vain sco minch'on gnü trais cults divins da Nadal e quatter cults divins da Silvester in nossa raspada. Per la prüma vouta vain gnü ün inscunter ecumenic per urar per la pasch ed eir il cult divin pel di d'urazchun mundial ha la gruppa da duonnas da Zernez organisà sco inscunter ecumenic. No vain gnü la predgia da Chalandamarz a Lavin – propcha adattada per giuven e vegl e no vain gnü il di da schoppa ecumenic a Zernez cun üna bellischma partecipaziun dad uffants e las catechetas in scoula primara, ma insomma cun bier agüd ed almain pels ons da meis presidi cun üna partecipaziun da record.

Id es propcha stat agreabel ed allegraivel da verer cha in nossa raspada vegna tgnü insembel e güdà tanter pêr, uschè per exaimpel vaivan üna part dals confirmands absolt lur dovair avant il di da schoppa ed han güdà voluntariamaing. Agüd voluntari vaina gnü da giuven e vegl. Eir scha cun ravarenda nun es la chüra d'ormas pel solid neir statta luxuriosa, vaivan temma cha sainza ravarenda as pudess dir cha quella vain massa a la cuorta. Uschè han duonnas (ed eir l'hom) dal consistori cumanzà a far visitas, surtuot a senioras e seniors e lura vaina badà cha'ls ravarendas Magnus ed Annette sun sainza dumandar e voluntariamaing eir stats a far üna o l'otra visita. Eir ils inscuntes cun nossas collavuraturas e nos collavuratur, da catechetas sur organistas, culuosters e culuostras, nossa secretaria o nossa cuschinunza voluntaria da la megltra schoppa chi dà o las duonnas chi organiseschon il di d'urazchun – im paran stats quist on amo plü agreabels e tuot chi d'eira pront da far amo alch daplü e güdar da maniera ch'eu n'ha tschüf adüna darcheu schlantsch e plaschair da far que chi'd es da far per quista raspada.

Sco tuots ils ultims ons, es per mai statta eir la collavuraziun culla giuventüna, voul dir cun confirmands e preparands, ma eir cun uffants plü giuvens e lur genituors ün plaschair. Eu nun invlid las bellas uras in viadi a Barcelona o cun preparar e far la predgia da la prüma dumengia d'Advent o quella da la confirmaziun. Que chi as dà cun far quella lavur vegn adüna inavo plü co üna vouta.

Ed eu nu less neir manchantar da dir qua quant allegraivla ed agreabla cha per mai es nossa cumünanza. Eu resaint cumünanza cristiana illas fracziuns da nos cumün chi passan sur ils cunfins confessiunals oura, sia que in occasiuns sco il viadi d'attempats o ils aperos davo ils cults divins specials o eir pro singuls inscunters in cumün.

Perque nun haja da plondscher da la blera lavur, dimpersè da dir grazcha per tuot ed a tuots perche nossa cumünanza am para da svilupper eir sainza ravarenda in üna dretta cumünanza eir sur tuottas quatter fracziuns oura.

Cler cha vus spettais uossa da mai eir infuormaziuns a regard l'occupar da nouv la piazza da ravarenda. Illa punt da marz fin mai n'haja scrit quant diffizil chi'd es – ed alch vaiva impromiss fingià l'on passà – No nu fain plü il sbagl dad ingaschar ün be per avair ün e lura avair ün chi nu fa böen.

Ün ravarenda o üna ravarenda per occupar la piazza pels prossems 20 ons nun es in vista, neir bricha inchün pels prossems 5 ons – i sun in Svizra eir vacantas var 200 plazzas da ravarenda e be in Grischun saja var 20 raspadas chi nun han ingün.

Però no vain dūrant il mais lügl forsa üna futura ravarenda da Zernez chi uossa es intant amo studenta da teologia chi vegn per trais eivnas a star in chasa pravenda e lavurar per nossa raspada. E no eschan in trattativas per ingaschar inchün chi fa üna substituziun da settember fin l'on chi vegn a Pasqua.

Uossa lessa ingrazchar a mias collegas dal consistori, a collavuraturas e collavuratur, a voluntaris e voluntarias ed insomma a tuots per la buna cumünanza.

Grazcha per l'attenziun – in buna fai

vos president

Tuot la radunanza ha splattà ed as ingrazcha cun quai pro Hermann.

4. Rendaquint 2022 e rapport dals revisurs da quint

Hermann da il pled a Flurina Walter ella preschainta il quint da gestiun ed il bilantsch per l'on 2022 e declera divers detagls. Il quint da gestiun da la raspada serra cun ün guadogn da 150'173.00 CHF. Flurina declera il motiv dal guadogn, quai da chefar cul barat da l'abitaziun da la chasa pravenda a Lavin culla chasa da pravenda a Zernez, no vain per quist barat laschè stimar da nouv l'abitaziun a Lavin e quella es gnüda plü ota. Implü nu vain gnü las sortidas da la paja da ravarenda, tras quai cha la piazza es statta per 10 mais vacanta.

La facultà nouva da la raspada as summa per la fin da l'on 2022 a 1'399'789 CHF inclusiv contos specials.

Nos president Hermann orientescha eir amo in detagl, il scumpart dals cuosts sün las baselgias da las differentas fracziuns.

Per finir driva el il votum per dumondas? Cun quai chi nu dà ulteriuras dumondas dà el inavant il pled als revisurs da quint.

Il revisur Riet Felix legia avant il rapport dals revisurs da quint. Sia collega Manuela Bonifazi es eir preschainta, intant cha la terza collega, Esther Christoffel, as ha stuvü s-chüsar per quista radunanza. Il rapport es scrit cha tuot es in bun uorden e manà tenor las pretaisas. Ils revisurs da quint propuonan dad approvar il quint ed eir da dar dis-charg als organs respunsabels. La radunanza segua a quella proposta sainza cuntravusch.

5. Orientaziun trattativas/ barat chasa Pravenda Zernez abitaziun Lavin

Hermann Thom declera las trattativas da la chasa da Pravenda a Zernez e l'abitaziun da Pravenda a Lavin, el disch eir chi'd es be ultimamaing statt ün artichel illa gasetta sur da quistas trattativas. Uossa vegnan preschantats ils contrats correspondents a la radunanza per far bun quels.

No eschan fingià daspö var quatter ons cha provain da dir chi's pudess barattar l'abitaziun culla chasa pravenda. Hermann ha eir illas radunanzas dals ons passats adüna darcheu manzunà ed orientà dal stadi da las trattativas. Cumanzà vaiva cul fat cha in radunanzas cumünalas vaiva el adüna darcheu manzunà cha illa chasa da pravenda a Zernez füssa da far differentas reparaturas, da vart dal cumün politic esa però gnü signalisà cha las prioritats per las expensas sun tuot otras. Ultra da quai es gnü da vart dal cumün politic plü co üna vouta la dumonda scha la raspada evangelica nu less renunzchar sün seis drets, per cha la chasa pravenda pudess gnir vendüda. Uschè d'eira gnü il consistori a la conclusiun chi saja prudaint da svesc vulair cumprar quella. Uschè d'eira nat il proget da barattar ella cull'anteriura abitaziun da pravenda a Lavin e cun pajar lasura amo raduond 300'000.00 CHF. Quella proposta d'eira lura gnüda preschantada al cumün da vaschins chi'd es possessur sco eir al cumün politic chi ha l'usufrüt dals fits. Sün quai d'eira gnüda preschantada l'idea a las radunanzas dal cumün da vaschins e quella da la corporaziun evangelica per decider da proseguir cullas trattativas e dar la cumpetenz a las suprastanzas da stipular ün contrat. Dürant il temp da quistas trattativas es gnü actual eir amo il seguond aspet da la tractanda, nempe da güdar ad üna buna soluziun cun far vnala üna parcella a Lavin per promover la pussibilità da realisar il fabricat d'üna garascha pel tren da pumpiers pro la staziun da Sagliains a Lavin. Quellas trattativas han manà al contrat da vendita da quella parcella a Peider Saluz sco recumpensa per terrain ch'el es stat pront da ceder a la Viafier Retica per realisar la staziun da Sagliains e uossa eir la garascha pels vaguns dals pumpiers.

Uossa vegnan ils duos contrats preschantats detagliadamaing a la radunanza:

Ün regla il barat masdà cun vendita, tenor il quai la corporaziun evangelica surdà plüssas parcelas da terrain agricul, sco eir l'abitaziun da pravenda ed il terrain chi tocca pro quella e paja amo la summa da CHF 299'600.- per survgnir la chasa pravenda a Zernez.

l'l seguond vaja per la vendita da la parcella agricula güst sur la staziun per personas da Sagliains a Peider Saluz, per ün predsch da CHF 10'760.-.

Tuots duos contrats sco eir la votaziun separada sur da l'import da CHF 299'600.- per pajar la differenza per pudair surtour la chasa pravenda, sun gnüts approvats da la radunanza sainza cuntravusch però cun üna abstenziun da vusch.

6. Preventiv 2024

La suprastanza preschainta il preventiv per l'on 2024 sco referenza es gnü tuot il quint da l'on 2022 chi'd es contabilisà cul sistem HRM2. Il president, Hermann Thom, manzunna eir chi'd es da tegner quint i'l preventiv dad avoir il 2024 darcheu üna o ün

ravarenda. El disch chi saja adüna greiv far ün preventiv e da savair che chi capitara. In quist cas esa plü realistic da far quint cun üna pitschna perdita. Quai causa cha dal 2022, sco on da referenza es aint il quint la nouva valütaziun da l'abitaziun da pravenda a Lavin ed ultra da quai es la piazza da ravarenda statta d'ürant 10 mais vacanta. El driva la discussiun pel preventiv. Da quella nu vain fat adöver e la radunanza fa bun il preventiv cun unanimità da vuschs.

7. Fixar il pè d'impostas da la baselgia per l'on 2024

La proposta dal consistori es quella da laschar il pè d' imposta sco fin qua, pro 18.5% da l'imposta simpla dal chantun Grischun. Quel as metta insembel da 15% imposta da baselgia per la raspada e 3.5% imposta per l' equalisaziun chantunala. La proposta vain approvada da la radunanza cun unanimità da vuschs.

8. Orientaziun / Varia

Il president, Hermann Thom da liber il pled suot vaira.

Duonna Toutsch dumonda che chi saja previs da far culla chasa da pravenda. Il president declera chi sajan sgüra da far differentas renovaziuns. El fa quint dad ir lura pro differentas organisaziuns e fonds a dumandar raps per realisar quellas. Sco prossem pass saja però sgüra da tour uossa ün per ras in man per laschar far ün proget complessiv. Fingia previs saja da müdar intuorn il s-chodamaint sün quel dal cumün cun ziplas e na plü avair quel dad öli sco fina uossa. Gio'n schler esa bliers gronds locals chi's pudess far alch landroura, ed implü vessan sgüra eir gugent ad far üna colliaziun directa per rivar da l'abitaziun o dal plan s-chala giò in curtin.

Jack Pinggera dumonda chi chi guarda per intant da la chasa da pravenda. Hermann Thom respuonda cha Flurina Walter haja surtut il custodi e pulischa il plan suot e cha d'ürant ün temp quista stà abitarà la Lucia Büehlmaier sül plan sura. Quel drizzaina aint per ch'el saja pront schi vain lura adüna darcheu ün o l'oter ravarenda a güdar oura o a surtour la piazza da substitut. Il üert vain cultivà e dovrà da la famiglia protugisa chi sta daspera ed ha dumandà da pudair far adöver dal curtin, intant chi nu sta là ingün.

Peider Saluz ingrazcha a la radunanza cha el ha gnü la pussibilità da cumprar giò quel toc terrain da la baselgia ed uschè avair darcheu almain tant terrain, co avant chi'd es gnüda fabbricada la staziun per peduns a Sagliains e la garascha pels vaguns da pumpiers.

Ottilia Godly ingrazcha a Hermann Thom per seis ingaschamaint e sia lavur implü d'ürant la vacanza da ravarenda e til giavüscha ün bun pelegrinadi, ch'el farà d'ürant il prossem mais e mez. Ella surdà sco regal ün sach cun frütta secha e nuschs sco proviant da viadi. Hermann piglia l'ocasiun dad ingrazchar fich a sia mamma chi d'ürant sia assenza surpiglia il servezzan da culuoster a Susch ed a las collegas dal consistori chi surpiglian la respunsabilità e tiran il char d'ürant sia assenza, ma eir ad oters chi güdan e pensan eir cun el sur tuot on per la baselgia cun tuot la raspada. El

as allegra da pudair ir a far quist peleginadi e spera da pudair tuornar lura la mità da gùn cun nouv schlantsch.

La sezzüda ha pudü gnir serrada las 21:05h

Davo han ils preschaints pudü star amo da cumpagnia pro ün aperò.

In buna fai, l'actuara Flurina Walter.